

ԿԻԼԻԿԱՆ ՀԱՅԱՍՏԱՆԸ ՈՒ ՍԻՐԻԱՆ
XII ԴԱՐԻ 40—70-ԱԿԱՆ ԹՎԱԿԱՆՆԵՐԻՆ

Վ. Ա. ՏԵՐ-ՂԵՎՈՆՅԱՆ

1144 թ. դեկտեմբերի 24-ին Մոսուլի աթաբեկ Իմադ ալ-Դին Զանգիի բանակը գրավեց Արևելքում խաչակիրների հաստատած առաջին իշխանության՝ Նդեսիայի կոմսության մայրաքաղաք Նդեսիան¹։ Դա սկիզբ դրեց Նդեսիայի կոմսության ողջ տարածքի նվաճմանը։ Զանգիների և Իկոնիայի սելջուկների ձեռքն ընկան Վերին Միջագետքն ու Եփրատացիք նահանգը՝ իրենց բոլոր քաղաքներով ու ամրոցներով։ Նդեսիայի գրավումը միաժամանակ նշանավորում էր մահմեդական տիրույթներում անիշխանության ու մասնատվածության ավարտը և Արևելքում ուժերի մոտավոր հավասարակշռության հաստատումը խաչակիրների և մահմեդականների միջև։ Թեև նախաձեռնությունն արդեն անդառնալիորեն անցել էր վերջիններս։

1146 թ. Իմադ ալ-Դին Զանգիի մահից հետո, նրա որդին՝ Նուր ալ-Դին Մահմուդ իբն Զանգին ժառանգեց Մոսուլի աթաբեկության արևմտյան տիրույթները (Հյուսիսային Սիրիա)։ Մոսուլը բաժին հասավ եղբորը՝ Սալֆ ալ-Դինին։ Նուր ալ-Դինը, մոտ երեսուն տարի գտնվելով գրեթե անընդատ պատերազմների մեջ, Հյուսիսային Սիրիայի տարածքն ընդգրկող ամիրությունը վերածեց մի ընդարձակ պետության²։

Նուր ալ-Դինի գահակալման ժամանակաշրջանը՝ 1146—1174, գրեթե համընկավ Կիլիկիայի երկու իշխանապետերի՝ Թորոս II-ի (1145—1169) և նրա եղբոր՝ Մլեհի (1170—1175) իշխանության տարիներին։ Սա Կիլիկիայի հայկական իշխանապետության վերականգնման, նրա հողերի ազատագրման և Ռուբինյան իշխանության ամրապնդման ժամանակաշրջանն էր, որը համընկավ Արևելքում տեղի ունեցած վերոհիշյալ իրադարձություններին և անկասկած, այս կամ այն չափով կապված էր դրանց հետ։

Թե՛ Թորոս II-ը և թե՛ Մլեհը Կիլիկյան Հայաստանի նշանավոր պետական գործիչներ էին։ Երկու եղբայրներն էլ աչքի ընկան ոչ միայն որպես քաջ զորավարներ, այլև որպես հմուտ դիվանագետներ։ Մի բան, որ չափազանց կարևոր էր բոլոր կողմերից գիշատիչ պետություններով շրջապատված Կիլիկիայի համար։

Եթե Թորոս II-ը հռչակվեց նրանով, որ նախ վերականգնեց կործանված իշխանությունը, իսկ հետո հաջող կերպով պաշտպանեց այն բյուզանդական հզոր բանակների հարձակումներից³, ապա Մլեհը աչքի ընկավ իր նուրբ և հեռատես՝ դիվանագիտությամբ։ Նա, ճիշտ կողմնորոշվելով ժամանակի քաղաքական բարդ իրավիճակում, չխորշեց դաշնակցել մահմեդական տիրակալին՝ Նուր ալ-Դինի հետ⁴։ Մի բան, որն իր նախորինակը չունի Կիլիկյան Հա-

¹ N. Elisseff. Nur ad-Din. T. II, Damas, 1967, p. 380.

² Տե՛ս նույն տեղում։

³ Chronique de Michel le Syrien. T. III, Bruxelles, 1963, p. 311; Никиты Хониата. История. Т. I, С.-Петербург, 1860, с. 129—130; Г. Г. Микаелян. История Киликийского Армянского государства. Ереван, 1952, с. 110—126. Հայ ժողովրդի պատմություն. Կ. Յ, Երևան, 1976, էջ 681—683.

⁴ Մահմուտ Սպարապետ. Տարեգրք, Փարիզ, 1959, էջ 99—102; Chronique de Michel le Syrien, p. 331. Հայ ժողովրդի պատմություն. Կ. Յ, էջ 683—684; Г. Г. Микаелян. Указ. соч., с. 126—130.

յաստանի պատմության մեջ, թեև հայտնի են մահմեդականների հետ հայերի համագործակցության առանձին դեպքեր:

* * *

Դեռևս 1137-ին, Հովհաննես Կոմնենոս կայսեր հայտնի արշավանքից հետո, Բյուզանդական կայսրությունը վերականգնել էր իր գերիշխանությունը Կիլիկիայի և Անտիոքի վրա: Բայց բյուզանդական նվաճումն անկայուն էր, և կայսրը իր գահակալության վերջում (1142 թ.) ստիպված էր ևս մի արշավանք ձեռնարկել դեպի Արևելք, որի նպատակը, ըստ դեպքերին ժամանակակից բյուզանդացի պատմիչ Նիկետաս Խոնիատեսի, Հայաստանի գործերի կարգավորումը և իր նախորդ արշավանքի ժամանակ նվաճած քաղաքների ու ամրոցների հավատարմության ապահովումն էր⁵: Բայց կայսրը չի գնում Լեոնային Կիլիկիա, այլ շարժվում է դեպի Անտիոք, այդպես էլ չապահովելով «քաղաքների ու ամրոցների հավատարմությունը»⁶: Այդ է պատճառը, որ երբ Հովհաննես Կոմնենոսի կողմից գերված Լեոն իշխանապետի որդի Թորոսը փախավ բյուզանդական գերությունից ու վերադարձավ Կիլիկիա, կարողացավ կարճ ժամանակամիջոցում, հենվելով հայ բնակչության վրա, վերականգնել Ռուբինյան իշխանությունը (1145 թ.):

Յոթ տարի անց՝ 1152-ին, Թորոս II-ը, հայկական բանակի գլուխ անցած ջախջախեց բյուզանդական տիրապետությունը վերականգնելու նպատակով Կիլիկիա ներխուժած Անդրոնիկոս զորավարի բանակը:

Այդ ընթացքում Ռուբինյան իշխանության արտաքին քաղաքականության մեջ կարևոր դեր սկսեցին խաղալ երկու հզոր հարևաններ՝ Իկոնիայի սուլթան Մասուդը և Հալեպի տեր Նուր ալ-Դինը: Սրանք իրենց մեջ բաժան-բաժան արեցին Նախկին Եդեսիայի կոմսության հողերը: Մասուդը տեր դարձավ Մալաշին, Քեսունին, Ռաբանին, Մարգուբանին, Այնթաբին և Տլուքին, իսկ Նուր ալ-Դինը, գրավելով Գուրոսը, Ազազը, Ռավանդանը, Թեյ Բաշիրը (Թլպաշար), Թեյ խալիզը, Հիսն Կարդինը և ալ-Ջաուզ գետի գավառը, գրեթե սահմանակից դարձավ Կիլիկիայի հայկական իշխանապետությանը, սպառնալով ոչ միայն նրա, այլև խաչակրաց պետությունների ամբողջականության:

Նուր ալ-Դինին դիմագրավելու համար Երուսաղեմի թագավորը իր բանակով 1155 -ին շարժվեց հյուսիս՝ դեպի Անտիոք, որտեղից սուրհանդակներ ուղարկեց «Թորոսի, մի շատ հզոր հայ իշխանի»⁷ մոտ, նրան բարեկամաբար հրավիրելով մասնակցել իր արշավանքին: Ըստ Գիյոմ Տյուրոսցու, «Թորոսը պատրաստակամությամբ ընդունեց հրավերը: Վճռական ու եռանդուն այդ մարդը անմիջապես մի մեծ բանակ հավաքեց և արագ շարժվեց դեպի Անտիոք»⁸: Թորոսի գլխավորությամբ հայկական բանակի տեղ հասնելուն պես միացյալ զորքը հարձակվեց Որոնտես գետի ափին գտնվող Զանգինների Շայ-զար նշանավոր ամրոցի վրա (Կենտրոնական Սիրիա): Կարճատև պաշարումից հետո ամրոցը գրավվեց⁹: Նուր ալ-Դինի որևէ պատասխան գործողության մասին աղբյուրը ոչինչ չի հաղորդում:

Նուր ալ-Դինի ստեղծած սպառնալիքի դեմ Ռուբինյանների և Անտիոքի իշխանության կնքած դաշինքին միացավ նաև Բյուզանդական կայսրությունը, հավանաբար համոզված լինելով, որ հիշյալ ամիրությունը հետագայում

⁵ Никиты Хониата История. Т. 1, с. 129—130; Հայ ժողովրդի պատմություն. հ. 3, էջ 680, 681:

⁶ Никиты Хониата История, с. 175—177.

⁷ A History of Deeds Done Beyond the Sea, by Willlam Archbishop of Tyre. Tr. by Babcock and Krey. Vol. I, New York, 1943, p. 265.

⁸ Նուր տեղում, էջ 265—266:

⁹ Նուր տեղում:

կարող է սպառնալ նաև իրեն: Մանուել Կոմնենոս կայսրը, նույնիսկ անտեսելով այն հանգամանքը, որ Անտիոքի Ռեյնալդ իշխանը Թորոս II-ի համագործակցությամբ ասպատակել էր Բյուզանդիային պատկանող Կիպրոս կղզին, միացավ նրանց¹⁰: Երուսաղեմի թագավոր Բաղդուինը, որը մեծապես շահագրգռված էր Անտիոքի և Կիլիկիայի զինակցությամբ նուր ակ-Դինի դեմ պայքարելու համար, եռանդուն կերպով միջնորդեց և նպաստեց նրանց հաշտությանը:

Այնուհետև կայսրը երկու իշխանների և Երուսաղեմի թագավորի հետ ռազմական դաշինք կնքեց ընդդեմ օրեցօր հզորացող Նուր ակ-Դինի: Դեպքերին ժամանակակից հայ պատմիչ Գրիգոր Երեցը այդ առթիվ գրում է. «Յէտայտորիկ խորհուրդ բարի ի մէջ առեալ թագաւորքն¹¹ և անյաղթելի զօրք փրկեալն¹², տէրն Անտիոքու և Թորոս, միահամուռն ազգ քրիստոնէիցն հաւատովք և ջերմեռանդն սրտիւ միաբանեալ կամ մեռանիլ և կամ փրկել զանգերծանելի գերեալսն ի բազում ժամանակաց յարինաշէն քաղաքէն Հալպայ և Դմշկայ»¹³:

Սակայն միացյալ արշավանքը մահմեդական Սիրիայի վրա չկայացավ: Լսելով, որ Կոստանդնուպոլսում գահի դեմ խռովություն է ծագել, կայսրը վերադարձավ մայրաքաղաք: Նրա հեռանալուց հետո (1159) Նուր ակ-Դինի սպառնալիքը խաչակիրների և Կիլիկիայի նկատմամբ ավելի շոշափելի դարձավ¹⁴: Այս տարիներին մեկը մյուսի հետևից ստեղծվեցին մի շարք անկայուն ռազմական դաշինքներ, ուղղված այս կամ այն մեծ պետության դեմ, բայց դրանք շուտով քայքայվում էին, այդպես էլ ոչ մի իրական արդյունքի չհասնելով: Այդպես քայքայվեց վերոհիշյալ Բյուզանդիա—Կիլիկիա—խաչակիրներ դաշինքը ընդդեմ Նուր ակ-Դինի: Դրան անմիջապես հաջորդեց նույնքան անպտուղ ևս մի հակազանդիական դաշինք՝ Իկոնիա—Կիլիկիա—խաչակիրներ¹⁵:

Ի վերջո, Մանուել Կոմնենոս կայսրը ոչ միայն հաշտություն կնքեց իր երեկվա թշնամու՝ Նուր ակ-Դինի հետ (1159), այլև կարողացավ նրան դուրս բերել կայսրության համար շատ ավելի մոտ թշնամու՝ Իկոնիայի Կըլըշ Արսլան II-ի դեմ, որն անընդհատ սպառնում էր բյուզանդական սահմաններին: Հաշտության հաջորդ տարում՝ 1160-ին Նուր ակ-Դինը պատերազմ սկսեց Իկոնիայի դեմ: Նա գրավեց Ռաբանը, Քեսունը, Բեհեսնին և Մարաշը: Կըլըշ Արսլանը միայն զիջումների գնով կարողացավ հաշտություն կնքել Նուր ակ-Դինի և Բյուզանդիայի հետ¹⁶: Այսպիսով, մեծ մասամբ հայաբնակ վերոհիշյալ հողերը միացվեցին Նուր ակ-Դինի պետությանը: Նա Ռուբինյաններին սահմանակից դարձավ նաև արևելյան կողմից, անմիջական սպառնալիք ստեղծելով Կիլիկիայի Հայաստանի ինքնուրույնությանը: Հայերն ու խաչակիրները, դաշինքներով կապված լինելով թե՛ Բյուզանդիայի և թե՛ Իկոնիայի սելջուկների հետ, սպասողական դիրք գրավեցին և հիշյալ պատերազմին չմասնակցեցին:

Նվաճման վտանգը կախված էր նաև Բյուզանդիային պատկանող Դաշտային Կիլիկիայի վրա: Ահա թե ինչու Բյուզանդիան ևս մեկ անգամ փոխեց իր քաղաքական դիրքորոշումը՝ խաչակիրների ու հայերի հետ մեկտեղ կրկին հանդես գալով ընդդեմ Հալեպի տիրակալի: 1164 թ. օգոստոսի 11-ին Անտիոքից արևելք գտնվող Հարիմ բնակավայրի մոտ Դաշտային Կիլիկիայի բյուզանդական կառավարիչ Կոստանդին Կալոմանը, Անտիոքի իշխան Բոհեմունդը, Տրիպոլիսի դուքս Ռայմոնդը, Թորոս II-ն ու իր եղբայր Մլեհը ճակատա-

10 Г. Г. Микаелян. Указ. соч., с. 120.

11 Նկատի ունի բյուզանդական կայսր Մանուել Կոմնենոսին և Երուսաղեմի թագավոր Բաղդուինին:

12 Նկատի ունի Հյուրընկալ և Տաճարական ասպետներին:

13 Մատթեոս Ուռհայեցի. Ժամանակագրություն. Վաղարշապատ, 1898, էջ 419—421:

14 Г. Г. Микаелян. Указ. соч., с. 124.

15 Մատթեոս Ուռհայեցի, էջ 413:

16 C. Cahen. La Syrie du Nord à l'époque des Croisades et la principauté franque d'Antioche. Paris, 1910, p. 403—404.

մարտ տվեցին ընդդեմ Նուր ալ-Դինի, որն ավարտվեց վերջինիս հաղթանակով: Գերությունից կարողացան խուսափել միայն Թորոսն ու Մլեհը, որոնք վերադարձան Կիլիկիա¹⁷:

Հարիմի ճակատամարտին հաջորդած իրադարձությունների մասին հետաքրքիր տեղեկություններ է հաղորդում Միքայել Ասորի պատմիչը: Ըստ նրա, նույն 1164-ին Թորոսը միջոցներ ձեռնարկեց հիշյալ ճակատամարտում գերի ընկած հայ ղեկավորներին ազատելու համար: Նա բանակցությունների մեջ մըտավ Նուր ալ-Դինի հետ, բայց Սիրիայի տիրակալը մերժեց վերադարձնել գերիներին: Որոշ ժամանակ անց, օգտվելով այն բանից, որ Նուր ալ-Դինը Հարավային Սիրիայում գրոհում էր ֆրանկների Բանիյաս ամրոցը, Թորոսը հարձակվեց Սիրիայից կախման մեջ գտնվող Մարաշի գավառի վրա: Այստեղ նա մոտավորապես շորս հարյուր գերի վերցրեց, այդ թվում Մարաշի շրջանում կանգ առած Զանդինների բանակի թուրքական ջոկատներին, այնուհետև սպառնաց նրանց կոտորել, եթե իր պահանջը չբավարարվի: Նուր ալ-Դինը, չցանկանալով Թորոսի հետ բախվել, համաձայնեց սկսել գերիների փոխանակությունը¹⁸:

Հարիմի ճակատամարտից հետո քրիստոնյաների վիճակը շատ ավելի ծանր կդառնար, եթե Նուր ալ-Դինը իր ուղադրությունը չդարձներ դեպի հարավ՝ Եգիպտոս, որտեղ Ֆաթիմյանների թուլացումից օգտվելով, փորձում էին իրենց ազդեցությունը տարածել թե՛ Երուսաղեմի թագավորությունը և թե՛ Զանգիները¹⁹: Այդ ժամանակ Նուր ալ-Դինի համար այնքան կարևոր էին Եգիպտոսի գործերը, որ նա. հյուսիսից իր թիկունքը հնարավոր հարձակումներից ապահովելու համար, Կլբը Արսլանին վերադարձրեց (1166 կամ 1167 թ.) Բեհսունին, Քեսունը, Մարաշը և, բացի այդ, իր խաղաղասիրական տրամադրությունները հավաստեց Բյուզանդիային, գերությունից ազատելով բյուզանդական զուկ Կոստանդին Կայսմանին և Անտիոքի իշխան Բոհեմունդ III-ին²⁰:

XII դարի 60-ական թթ. վերջին Կիլիկիայի իշխանապետ Թորոս II-ի և իր եղբոր՝ Մլեհի հարաբերությունները բավական սրվեցին: Մլեհը ամեն գնով ձգտում էր տիրանալ եղբոր իշխանությանը, չսորշելով անգամ նրան սպանելու նպատակով դավադրություն նյութել: Դավադրությունը բացահայտվեց, և Թորոս II-ը ստիպված էր եղբորը արտաքսել երկրից²¹: Մլեհը գնաց Հալեպ և ծառայության մտավ Նուր ալ-Դինի մոտ, նրանից որպես ավատական տիրույթ ստանալով Կյուրոս կամ Գուրոս քաղաքն ու գավառը²², որը գտնվում էր Այն-թարից հարավ-արևմուտք և Կիլիկիայից բաժանված էր միայն Ամանոսյան լեռներով: Այն, միաժամանակ, Հալեպ—Ալյաս առևտրական ճանապարհի վրա գտնվող կարևոր կենտրոններից մեկն էր²³:

¹⁷ Abu Shama. Des Deux Jardins, Recueil des Hist. des Croisades — Historiens Orientaux, t. IV, Paris, p. 108—109; Kamal ad-Din Ibn al-Adim. Histoire d'Alep. Damas, 1951, p. 319; William of Tyre. V. I, p. 307—308. S. Runciman. A History of the Crusades. V. II, Cambridge, 1952, p. 369; Ղ. Ալիշան. Միսուան. Վենետիկ. 1885, էջ 85:

¹⁸ Chronique de Michel le Syrien. T. III, p. 326.

¹⁹ C. Cahen. La Syrie du Nord..., p. 409:

²⁰ Նույն տեղում, էջ 411:

²¹ Մասուկի քահանա Անեցի. Հաւաքմունք ի գրոց պատմագրաց. Վաղարշապատ, 1893, էջ 135:

²² Սմբատ Սպարապետ. Տարեգիրք. Վենետիկ, 1956, էջ 167:

²³ Ղ. Ալիշան. նշվ. աշխ., էջ 56: Այս Գուրոսը, որ լավ ամրացված քաղաք էր, մի ժամանակ պատկանում էր Գող Վասիլի եղբայր Բագրատին, բայց Բաղդուին զը Բուրզը խլել էր այն՝ հայ իշխանից, միացնելով Եգիպտոսի կոմսությանը: Այս, ըստ երևույթի, հայաբնակ քաղաքն ու գավառը 1151—1152 թթ., ի շարս այլ վայրերի, անցավ Նուր ալ-Դինին, որն էլ այն հանձնեց Մլեհին, որպես կալված (տե՛ս Գ. Գ. Микаелян. Указ. соч., с. 79):

1169 թ. վախճանվեց Թորոս II-ը, իրեն հաջորդ թողնելով մանկահասակ որդուն՝ Ռուբեն II-ին խնամակալությամբ Թոմաս պալլի²⁴։ Նղբոր մահվան լուրը լսելով, Մլեհը Նուր ալ-Դինից ստացած օգնական զորաշուկատով մտավ Կիլիկիա և տիրացավ իշխանությանը (1170 թ.)²⁵։ Հենց այդ պահից նա դադարեց Նուր ալ-Դինի վասալը լինելուց և վերածվեց նրա դաշնակցի։ Այն բոլոր հողերը, որ հետագայում, վերոհիշյալ օգնական զորաշուկատի օգնությամբ, Մլեհը գրավեց հույներից և խաչակիրներից, նա միացրեց իր իշխանապետությանը։

Մլեհի արտաքին քաղաքականության մասին հետաքրքիր տեղեկություններ է հաղորդում բյուզանդացի պատմիչ Հովհաննես Կինամոսը. «Բերիայի սատրապ Նուրադինը, Լիկաոնիայի հեգեմոն սուլթանը, Հայոց իշխան Մլեհը և Անկյուրացոց և մյուս Դադատիայի արխոնտը համաձայնության եկան հռոմայեցի վոյս վրա արշավելու մասին»²⁶ (թարգմ. Հ. Բարթիկյանի)։

Ինչպես երևում է պատմիչի հաղորդումից, բացի Նուր ալ-Դինից, Լիկաոնիայի, կամ որ նույնն է Իկոնիայի սուլթանից և Մլեհ իշխանապետից, հակաբյուզանդական դաշինքի մասնակիցների մեջ էր նաև «Անկյուրացոց և մյուս Դադատիայի արխոնտը», որն ամենայն հավանականությամբ Դանիշմանյան տիրական էր։ Մլեհի դաշնակցությունը հարևան երեք մահմեդական պետությունների հետ (Ջանգինների պետություն, Իկոնիայի սուլթանություն, Դանիշմանյան ամիրություն), ապահով էր դարձնում Ռուբինյան իշխանապետության սահմանների մեծագույն մասը և միաժամանակ հզոր հենարան էր բյուզանդական կայսրության դեմ պայքարում։

Հենվելով Նուր ալ-Դինի տրամադրած օգնության վրա, Մլեհը 1173-ին վրձնական հաղթանակ է տանում բյուզանդական զորավարներ Միքայել Վուանասի, Կոստանդին Նվիդորպի և Կոստանդին Կալոմանի գլխավորած կայսերական բանակի դեմ և ազատագրում Դաշտային Կիլիկիայի մեծ մասը²⁷։ Մլեհի առարած հաղթանակի կարևորությունը երևում է արաբ պատմիչ Իբն ալ-Ասիրի տեղեկությունից։ Նա նախ գրում է, թե ինչպես Նուր ալ-Դինը օգտագործեց Մլեհին իր հավատակիցների դեմ պայքարում, դրանով իսկ ազատելով իր զորքի մի մասը հարևան երկրների վրա հարձակվելու պարտականությունից²⁸։ Ապա շարունակում է. «Սակայն Մլեհն էլ իր հերթին հենվում էր Նուր ալ-Դինի վրա տրացի հայերի²⁹ և հռոմեների դեմ [պայքարելու համար]։ Ադանա, Մամեստիա և Տարսոն քաղաքները Կոստանդնուպոլսի տիրոջ՝ Ռուսի թագավորի ձեռքում էին, իսկ Մլեհը վերցրեց նրանից, որովհետև դրանք իր երկրին հարևան էին։ Ռուսի թագավորը մեծ զորք ուղարկեց նրա դեմ, [հրամանատար] նշանակելով իրեն ազգական մի քանի հայտնի պատրիկներին։ Մլեհը Նուր ալ-Դինի զորքերի հետ նրանց դեմ դուրս եկավ պատերազմի և համառ կռիվից հետո հռոմեները պարտվեցին, շատերն սպանվեցին ու գերի ընկան։ Մլեհի ուժն ավելացավ, իսկ հռոմեներն իրենց հույսը կտրեցին այդ երկրից։ Մլեհը Նուր ալ-Դինին ուղարկեց իր ավարի զգալի մասը և երեսուն հոգի [հռոմեների] նըշանավոր ու երեւելի մարդկանցից։ Նուր ալ-Դինը սրա մի մասը ուղարկեց ալ-Մուստաֆի Բիամր-Իլլահ խալիֆային և գրեց նրան, հպարտանալով ձեռք բեր-

²⁴ Հայ ժողովրդի պատմություն. հ. 3, էջ 683։

²⁵ Chronique de Michel le Syrien, p. 331; William of Tyre. V. I, p. 386—387.

²⁶ Recueil des Historiens des Croisades, Historiens Grecs. T. I, Paris, 1875, p. 312.

²⁷ Ղ. Ալիշան. նշվ. աշխ., էջ 57։

²⁸ Օտար աղբյուրները Հայաստանի և հայերի մասին. 11. Արաբական աղբյուրներ. 2, Իբն ալ-Ասիր, թարգմ. Ա. Տեր-Ղևոնդյանի. Երևան, 1981, էջ 262—263։

²⁹ Նկատի ունի լամբրոնի հայ իշխաններին, որոնք Բյուզանդիայի վասալներն էին (տե՛ս Վ. Գ. Микаелян. Указ. соч., с. 128)։

ված հաղթանակով [որպես իրենը ներկայացնելով], քանի որ իր զինվորներն էլ էին այն իրագործել»³⁰։

Մի այլ տեղում իրն ալ-Ասիրը գովերգում է մահմեդական տիրակալին, նշելով, որ հայ իշխանին սիրաշահելը և նրան ընդդեմ ֆրանկների օգտագործելը վկայում էր նուր ալ-Դինի հնարամտության և խորամանկության մասին։ Մինչդեռ մի այլ աղբյուր՝ XIV դարի պատմիչ ալ-Ջահաբին բոլորովին տարբեր կարծիք է հայտնում։ Նա գրում է. «Նուր ալ-Դինը, այս իշխանի խորամտությամբ ու աննկուն բնավորությամբ հիացած, նրա մեջ տեսնում էր մի դաշնակցի՝ ֆրանկների դեմ պատերազմում։ Նա նրան տվեց Սսի երկրի հողերը, որպես կալված, ասելով, — Նա կովում է յուրայինների դեմ և մի պատենել է, որ կղմադրի Կոստանդնուպոլսի կայսրին»։ Ապա արար պատմիչը շարունակում է. «Բայց հոռոմների դեմ իր տարած հաղթանակից հետո Մլեհը հանդերձեց պաշտպանական ամրություններով ամրացնել Սսի երկիրը՝ [Մլեհի հանդերձեց] նուր ալ-Դինի տաժաժ չափից ավելի վստահությունը նրա թույլ տված սակավ սխալներից մեկն էր։ Աստծու ողորմածությունը նրա վրա»³¹։

Այս համագործակցությունը, իրոք, ավելի օգուտ բերեց Կիլիկիային։ Ժիշտ է, Մլեհը մի պատենել էր նուր ալ-Դինի և Բյուզանդիայի միջև, սակայն հետագայում նա, հենվելով նուր ալ-Դինի վրա, հասավ իր համար կենսական մի քանի հարցերի լուծմանը։ Նախ հույներից ազատագրեց Կիլիկիայի երեք մեծ քաղաքները՝ Տարսուսը, Ադանան ու Մամեստիան։ Ապա նաև, օգտվելով նուր ալ-Դինի հարվածների հետևանքով խաչակիրների թուլանալուց, Ամանուսյան լեռներում տեղ գարձավ Տաճարականների տիրույթներին, մասնավորապես Բաղրաս կամ Գաստոն ամրոցին, որը կարևոր ռազմագիտական դիրք ուներ Կիլիկիայի և Անտիոքի իշխանության սահմանագլխին։

Դեպքերի այսպիսի ընթացքը չափազանց վտանգավոր էր խաչակիրների համար։

Այն բանից հետո, երբ Զանգինների գլխավորությամբ սկսեց ձևավորվել մահմեդական ընդհանուր ճակատ ընդդեմ խաչակիրների, վերջիններս փորձում էին նույնպիսի միացյալ ճակատ ստեղծել քրիստոնյա պետություններից։ Ու թեև մինչ այդ խաչակիրները ավելի նպաստել էին հայկական իշխանությունների կողմանմանը, քան նրանց որևէ էական օգնություն ցույց տվել, Մլեհի բռնած դիրքը նրանց կողմից համարվեց դավաճանություն և տրամադրությունները նրա հանդեպ լարված էին։

Ի վերջո, 1173-ին Անտիոքի Բոհեմունդ III-ի խնդրանքով, Նրուսադեմի թագավոր Ամալրիկը կազմակերպեց մի արշավանք դեպի Կիլիկիա։ Բայց նուր ալ-Դինը, որպես Մլեհի դաշնակից, մի ռազմարշավ կազմակերպեց Կարակից վերև (Պաղեստին), որով ստիպեց Նրուսադեմի թագավորին ընդհատել արշավանքը դեպի Կիլիկիա³²։

Նուր ալ-Դինի մահից հետո (1174) Մլեհը իշխեց մեկ տարի։ Նա, մահմեդականների հետ դաշնակցելու, նաև իր խիստ նեղքին քաղաքականության պատճառով Կիլիկիայում ուներ բազմաթիվ հակառակորդներ։ 1175-ին նրա դեմ կազմակերպվեց մի դավադրություն։ Մլեհը սպանվեց դավադիր իշխանների կողմից Սսում³³, որը երկու ասորի առաջ հենց ինքը դարձրել էր Ռուբինյան իշխանապետության մայրաքաղաք։

³⁰ Օտար աղբյուրները..., Իրն ալ-Ասիր, էջ 263։

³¹ A l-D a h a b i. Kitab duwal al-Islam. Damas, 1979. p. 148.

³² C. Cahen. La Syrie du Nord..., p. 414. Հնարավոր է, որ եղած լինի երկու արշավանք, որոնցից վերջինիցը երկրորդն է, իսկ առաջինը (ըստ երևույթին 1172-ին ձեռնարկված) խաչակիրների համար հաղթողությամբ է ավարտվում։ Մլեհը խոստանում է չղաչակցել նուր ալ-Դինին և ենթարկվել Նրուսադեմի թագավորին։ Բայց այդ «հնադանդությունը» տևում է ընդամենը մեկ տարի։ (The Chronography of Bar Hebraeus Gregory Abu-l-Farag, tr... by Budge. Amsterdam, 1976, p. 288, S. Runciman. Op. cit., p. 320).

³³ Ս մ ր ա տ Ս պ ա ր ա պ ւ տ. Տարեգրք. Փարիզ, 1859, էջ 102։

Կարծիք կա, որ Մլեհը և Նուր ալ-Դինը իրենց անուններով դրամ են կոտրել, բայց սա հավանաբար շփոթության արդյունք է³⁴:

Մլեհին հաջորդած Ռուբեն III-ը (1175—1187), որը եղբոր՝ Ստեփաննի որդին էր, տեղեկացավ, թե ովքեր էին իր հորեղբոր սպանողները և մահապատժի ենթարկեց նրանց: Վնա ևս առաել այնոցիկ բարիս խոստանար որոց ձևումս սպանաւ հօրեղբայրն իւր՝ եթէ ժանիցէ զնոսա՝ Նւ յարևան արք երկուք խաբեալք յիմարութեամբ, և ասեն՝ մեք սպանաք ձեռօք մերովք զնա յաղազս սիրոյ քո. և նա յոյժ շնորհակալ եղև նոցա. և ապա հրամայէ կապել վէմս ի պարանոց նոցա և ձգել ծածկաբար ի գետն, որոց էին անուանքն միոյն Զահան և միւսոյն Ապլղարիպ, որ էր ներքինիս³⁵:

Սա չէր կարող միայն ազդականի վրեժխնդրություն լինել և, ըստ երևույթին, Մլեհի քաղաքականությունը Կիլիկիայում ուներ նաև իր կողմնակիցները:

Մլեհի հանդեպ հավատակիցների թշնամանքը հեշտ բացատրվում է միջնադարին բնորոշ կրոնական անհանդուրժողությամբ: Մինչդեռ նրա բռնած դիրքը մի խելամիտ դիվանագիտական քայլ էր, որի իրավացիությունն ապացուցվեց հետագա իրադարձություններով: Նուր ալ-Դինի հետ Մլեհի դաշինքի շնորհիվ Կիլիկիան չդարձավ մի վասալ իշխանություն (մանավանդ, որ նրա մահից հետո Զանգինների նախկին հողերը նվաճվեցին Եգիպտոսի Այյուբյան հզոր սուլթանի՝ Սալահ ալ-Դինի կողմից): Ավելին, ինչպես գրում է Իբն ալ-Ասիրը, «Մլեհին հաջորդող հայոց տիրակալը (ըստ երևույթին ի նկատի ունի (ևս) II-ին), մահմեդական երկրներից շատ քաղաքներ ու բերդեր գրավեց և դրանից մեծ շարիք ու հսկայական վնաս հասավ և այդ կորցրածը հնարավոր չէ ետ ստանալ»³⁶:

Դտնվելով չորս պետությունների (Բյուզանդական կայսրության, Իկոնիայի սելջուկյան սուլթանություն, Սիրիայի Զանգինների պետություն, Նուսազեմի խաչակիր թագավորություն) շրջապատման մեջ, որոնք բոլորն էլ գերազանցում էին հայկական իշխանապետությանը իրենց ռազմական ուժով, Թուրոս II և Մլեհ Ռուբինյանները կարողացան թե՛ զենքի ուժով և թե՛ դիվանագիտությամբ պահպանել իրենց դիրքերը բարդ քաղաքական իրադրության մեջ:

Այսպիսով, Արևելքում Նուր ալ-Դինի տիրապետության ժամանակաշրջանը (1146—1174) միաժամանակ Կիլիկիայի հայկական իշխանապետության վերականգնման, նրա հողերի ընդարձակման ու ամրապնդման մի կարեւոր ժամանակաշրջան է, երբ դրվում էին հայոց ապագա ժողկուն թագավորության հիմքերը:

³⁴ Խոսքը վերաբերում է մի պղնձադրամի, որի վրա Մլեհի անունը չի հիշատակված: Դրամի մի կողմում գրված է «Իշխանների թագավոր Մահմուդ», իսկ մյուս կողմում՝ «Արդար Նուր ալ-Դին» (V. Langlois. Numismatique de l'Arménie au moyen age. Paris, 1979, p. 35) Ի. Բրոսեն (Monographie des Monnaies Arméniennes, S.-Petersbourg, 1839, p. 25) և Ղ. Ալիշանը (Սխուան, էջ 56) այս դրամը վերագրել են Մլեհին և Նուր ալ-Դինին: Սակայն Վ. Լանգլուան գտնում է, որ հիշատակված մահմեդական իշխանավորը Ամիդ և Քայֆայի Արտուխյան ամիր Նուր ալ-Դին Մահմուդ Իբն Կարա Արսլանն է (1167—1185) և ոչ թե Սիրիայի տիրակալ Նուր ալ-Դին Մահմուդ Իբն Զանգին (1146—1174): Իսկ խաչ բռնած երկու մարդկանց պատկերները չեն կապվում Մլեհի հետ: Դրանք Դավթանների բյուզանդական տոհմին պատկանող երկու անձիք են: Այս դրամը Մլեհին չի վերագրում նաև դրամագետ Զ. Պտուկյանը (P. Z. Be-
doukian. Coinage of Cilician Armenia. New York, 1962, p. 8, 67).

³⁵ Սմբատ Սպարապետ. Տարեգիրք. Վենետիկ, 1956, էջ 192:

³⁶ Օտար աղբյուրները..., Իբն ալ-Ասիր, էջ 362:

КИЛИКИЙСКАЯ АРМЕНИЯ И СИРИЯ В 40—70-х ГОДАХ XII ВЕКА

В. А. ТЕР-ГЕВОНДЯН

Резюме

В 40-х годах XII в. на Востоке произошли события, которые изменили соотношение сил двух противоборствующих сторон—крестоносцев и мусульман. Среди этих событий решающими были взятие Эдессы (1144) и не удавшийся второй крестовый поход (1147—1149). В результате большая часть Сирии (вместе с городами Алеппо и Дамаск), а также некоторые районы Верхней Месопотамии стали подвластны Нур ал-Дину Зенги (1146—1174), а крестоносцы были оттеснены дальше на запад.

В таком сложном политическом положении в Киликийской Армении была в 1145 г. восстановлена (после 8-летнего византийского господства) власть Рубенидов. Торос II (1145—1169) сумел не только восстановить армянское княжество, но и нанести поражение византийским войскам (1152). По мере усиления Нур ал-Дина стали образовываться военные союзы христианских государств, направленные против агрессивного эмира. Один из таких союзов между Византией, крестоносцами и Киликийской Арменией (1159) ни к чему не привел, а в 1164 г. в битве при Хариме объединенным силам византийцев, крестоносцев и армян Нур ал-Дин нанес тяжелое поражение.

Иной политики придерживался князь Млех, который после смерти своего брата Тороса захватил с помощью Нур ал-Дина власть в Киликии (1170—1175). Млех предпочел быть союзником мусульманского эмира, который в начале 70-х годов находился в апогее могущества. Армянские летописцы того времени описывают Млеха исключительно отрицательными чертами, что объясняется его союзом с соседними мусульманами, а также жесткой внутренней политикой. Однако сведения мусульманских историков показывают, что союз Млеха и Нур ал-Дина был взаимовыгоден. Если Нур ал-Дин с помощью этого союза обезопасил свои границы со стороны Византии, то Млех нанес поражение византийцам, освободив большую часть Равнинной Киликии вместе с тремя большими городами (Тарс, Адана и Маместия), а также успешно воевал против крестоносцев.

Таким образом, 40—70-е годы XII в.—период усиления государства Зенгидов в Сирии при Нур ал-Дине (1146—1174), но и период восстановления и укрепления армянского княжества Рубенидов. Торос II и Млех своими успешными войнами и разумной внешней политикой подготовили почву для создания Киликийского армянского царства в конце XII века.